



Reykjavíkurborg

Reykjavík, 20. febrúar 2023
MOF23010074

Borgarráð
Ráðhúsi Reykjavíkur
101 Reykjavík

Bandalag íslenskra listamanna - BÍL - Þjónustusamningur 2023

Á fundi menningar-, íþróttá og tómstundaráðs þann 27. janúar sl. var lagður fram til samþykktar nýr þjónustusamningur við Bandalag íslenskra listamanna um samvinnu á sviði menningarmála. Samningurinn var samþykktur og er hér með vísað til borgarráðs.

Virðingarfyllt,

Eiríkur Björn Björgvinsson
Sviðsstjóri Menningar- og íþróttasviðs

Hjálagt:

Þjónustusamningur við BÍL 2023

Menningar- og íþróttasvið, f.h. Reykjavíkurborgar, kt. 530269-7609, Ráðhúsi Reykjavíkur, Tjarnagötu 11 og Bandalag íslenskra listamanna (BÍL), kt. 440169-2959, gera með sér svohljóðandi

Þjónustusamning um samvinnu á sviði menningarmála

1. gr. Tilgangur og gildissvið

Reykjavíkurborg og BÍL hafa gert þjónustusamning frá árinu 2007 og eru sammála um að halda áfram samstarfi sínu næsta árið. Markmið samstarfsins er gagnkvæmur ávinningur þar sem Reykjavíkurborg styrkir starf BÍL sem veitir Reykjavíkurborg ráðgjöf og aðstoð samkvæmt nánara samkomulagi.

2. gr. Samningsverkið

Bandalag íslenskra listamanna lætur Reykjavíkurborg í té umsagnir, álitsgerðir, upplýsingar og ráðgjöf um mál sem Reykjavíkurborg vísar til slíkrar umfjöllunar. BÍL hefur einnig milligöngu um öflun upplýsinga og umsagna frá einstökum aðildarfélögum óski Reykjavíkurborg þess.

Málefnasvið sem umfjöllun samkvæmt málsgrein þessari getur tekið til eru meðal annars: Samstarf um endurskoðun menningarstefnu fyrir Reykjavíkurborg og úttektir henni tengdar. Stefnumörkun í einstökum greinum lista, tölfræði um listalíf í Reykjavík, tilnefningar stjórnar BÍL í ráðgjafahópa að ósk menningar- íþróttar- og tómstundaráðs, s.s. um styrkveitingar og tilnefningar áheyrnarfulltrúa á fundum ráðsins. Undirbúningur opinberra funda á vegum Reykjavíkurborgar er varða listir og menningu og kynningu á íslenskri list, m.a. í skólum. Jafnframt fjölþjóðlegt samstarf á sviði lista og önnur mál er varða listir og listamenn almennt er geta komið Reykjavíkurborg til góða. Markmið samvinnunnar er meðal annars að stuðla að því að fyrir hendi séu jafnan sem gleggstar upplýsingar um listalífið í Reykjavíkurborg og þróun þess.

3. gr. Fjárhagsskuldbindingar og greiðslur

Samningur þessi gildir fyrir árið 2023. Reykjavíkurborg greiðir BÍL kr. 1.060.000 af kostnaðarstað 09510 fyrir framangreinda þjónustu. Greiðslan er innt af hendi 1. – 3. júní 2023 gegn framvísun reiknings.

4. gr. Ábyrgðaraðilar og tengiliðir

Umsjón og eftirlit með framkvæmd samnings þessa er hjá skrifstofu menningarmála á Menningar- og íþróttasviði Reykjavíkurborgar. Forseti BÍL hefur umsjón með framkvæmd samningsins fyrir hönd samtakanna og er tengiliður við Reykjavíkurborg.

5. gr. Eftirlit, eftirfylgni og kynningarmál

BÍL skal skila greinargerð að loknu starfsárinu um ráðstöfun fjárframlags Reykjavíkurborgar og framvindu samstarfsins, í síðasta lagi 1. maí 2024, og árituðum ársreikningi þegar hann liggur fyrir en þó eigi síðar en á samráðsfundi aðila. Samráðsfund skal halda í maí þar sem farið er yfir framkvæmd samningsins. Skrifstofustjóri menningarmála boðar til fundanna.

BÍL skal halda kynningu á því verki sem fjárveiting fór til án sérstakrar þóknunar sé eftir því óskað af Reykjavíkurborg. Samtökin skulu upplýsa í kynningum á starfsemi sinni að þau séu styrkt af Reykjavíkurborg og getur félagið birt merki Reykjavíkurborgar í því skyni.

6. gr. Eignarréttur, höfundarréttur og trúnaður

Reykjavíkurborg er eigandi gagna sem myndast við vinnslu verkefna samkvæmt samningi þessum. Þeim má ekki dreifa eða afhenda án heimildar Reykjavíkurborgar sem fer með höfundarrétt hugverka og útgáfurétt rita.

Samningsaðilar skulu virða sem trúnaðarmál allar þær upplýsingar um starfsemi gagnaðila sem þeir kunna að öðlast við framkvæmd samnings þessa, enda séu þær ekki almennt þekktar eða hafi verið gerðar opinberar. Þagnarskyldan helst eftir lok efnda á samningi þessum.

7. gr. Fyrirvarar, vanefndir og meðferð deilumála

Samningur þessi er gerður með fyrirvara um samþykki borgarráðs.

Reykjavíkurborg áskilur sér rétt til að rifta samningi þessum og/eða krefjast endurgreiðslu ef sannanlega er um forsendubrest eða vanefndir að ræða af hálfu BÍL. Telji annar samstarfsaðili sig ekki geta uppfyllt ákvæði samnings þessa skal tilkynnt um það tafarlaust skriflega. Ef ekki tekst að endurskoða verkefnaáætlun þannig að markmiðum samningsins verði náð er Reykjavíkurborg heimilt að fella niður greiðslur til BÍL eða rifta samningnum. Ef fjárframlag frá Reykjavíkurborg er notað í öðrum tilgangi en samkvæmt samningi þessum eða á þann hátt að gengur í berhöggi við markmið og stefnu Reykjavíkurborgar áskilur Reykjavíkurborg sér rétt til að rifta samningnum og/eða krefjast endurgreiðslu framlagsins að hluta eða öllu leyti þegar í stað.

Skuldbindingar sem í samningi þessum felast skulu í engu raska sjálfstæði BÍL sem óháðra samtaka og skerða ekki möguleika þess að koma sjónarmiðum á framfæri við Reykjavíkurborg að eigin frumkvæði.

Rísi mál vegna samningsins skal það rekið fyrir Héraðsdómi Reykjavíkur.

8. gr. Framsal

BÍL er óheimilt að framselja skyldur sínar samkvæmt samningi þessum án samþykkis Reykjavíkurborgar. Samningur þessi er gerður í tveimur eintökum og heldur hvor aðili sínu eintaki.

Samningur þessi er staðfestur með rafrænni undirritun fulltrúa beggja aðila samningsins.

f.h. Reykjavíkurborgar,

María Rut Reynisdóttir

f.h. Bandalags íslenskra listamanna,

Erling Jóhannesson